

# 我做金融呢行，遇過好多古靈精 怪既客

作者: 向日葵王子

Powered by [紙言](#)

# CASE I 你老婆死左未？

先講第一個，印象都好深刻下。

六月頭，因大陸親戚介紹下，識左一個男人，係深圳開左間工廠做橡膠既，四十幾歲，已婚，無子女，標準大陸佬樣，陸軍頭，大肚臍，Polo shirt，識廣東話，不過發音唔準。

六月份其實壓力都好大，因為有半年既Target要meet。

咁同個大陸佬（王總）傾左幾次電話，佢話手頭上有500萬可以用黎投資，咁我咪上深圳見佢啦，傾詳情，反正家在大西北，上深圳仲近過出旺角。

其實都唔係第一次番大陸見客，所以都駕輕就熟，B2十分鐘到深圳灣再轉的士，去佢南山區間廠到。

去到，第一次見到佢，比想像中高大，高我半個頭（本人都唔算矮），有少少壓迫感，但其實份人都算好nice，中間都有講有笑。

我：你想我係香港幫你投資d咩丫？股票？樓？

王：都可以，反正筆錢放係到都無咩用。

（類似呢d對話就唔打出黎喇，唔係重點，下刪一個鐘對話，跟住就開始來料喇。）

我：咁你有無諗住做投資移民落黎？（一定有香港市民diu我）

王：唔啦，我老婆唔落得黎。

我：點解既？

王：佢過唔到關架。

我：咁無辦法啦。

（雖然我仲好好奇，好想問落去，但見到佢好似有d難言之隱就算數啦，不過我心諗，唔通佢老婆係非法入境或者犯左法？）

結果同佢傾多陣，夜晚七點到，就同佢去左間餐廳食飯，八點半就食完。

王：不如你上黎我屋企啦。

我：唔洗麻煩你啦，仲早，我轉頭搭車番香港得架啦。

王：今晚一齊再研究下，聽朝一早同你一齊落香港簽約啦。

其實我好唔慣係人地屋企過夜，仲要係大陸，不過因為個男人係親戚介紹，親戚都講到佢好好仔咁，

又咁熱情留我，我推左一陣都唔好意思，又驚得失佢，斷估唔會訓訓下無左d器官既！我果陣真係諗埋呢d on9 野。

跟住佢揸車去左佢屋企，半個鐘到，我都唔知去左邊，類似香港既圍村啦，一幢兩層，每兩幢痴埋一齊，因為我見到有兩個正門，簡單d講，即係一個圍欄圍住兩個單位，每個單位有兩層，但睇落又唔係豪宅黎，有少少殘殘地，好暗，大陸d街燈真係差過香港好多。

一入到佢屋企，就發覺部電視開緊，但無人係到睇緊，應該係佢老婆走開左姐。

跟住同王總坐係梳化，研究緊A股H股，但一直無人望部電視，我對咩鳳凰衛視又無興趣，佢又專心研究緊，我咪諗住熄左佢啦，廢事嘈住晒。

我：不如熄左部電視啦，反正無人睇。

王：唔好！我老婆好鍾意睇。

但由頭到尾都無見過佢老婆出現，到呢一刻，我忍唔住問。

我：王總，你老婆呢？

王：佢夜晚無化妝，唔鍾意見人。

我：哦。（心諗：睇乜野電視丫咁）

話口未完，部電視無啦啦轉左台，轉左個我又係唔識既台，我個心好突然咁跳左一下大大力既。

我：做乜自己轉台既？

王：隔離果家人都係用呢款電視機，佢個遙控有時會控制埋呢邊。

嘩！有無咁神奇？但聽落又好似好合理咁，信住先。

大約十點到，部電視終於熄左，強調，係佢自己熄既，解釋當然又關個遙控事啦，之後個廁所燈無啦啦開左，又開又熄，閃左幾下，跟住熄左。

佢解釋係：電力供應不穩，成日都係咁架啦。

但我覺得，根本就好似有個人睇完電視去廁所咁！！！！

你老味，我好似入左間鬼屋！

有人問我點解仲唔走？一黎如果我自己一個出去，我會仲驚，二黎存僥倖心理，幻想佢既解釋係事實，我自己諗多左姐，三黎，錢作怪，唉！

十一點左右，佢就話要休息喇，我呢d夜貓當然仲好精神啦，王總帶左我上二樓間客房，佢自己就去另一間房訓，都係果句，由頭到尾都無見過佢老婆。

咁我訓係張床，又訓唔著，又唔想亂諗野，咪玩下手機，上discuss睇post囉，去到大約一點左右，我聽到出面有喊聲，低聲啜泣果隻。

我嚇到即刻跑去道門到，check多次有無鎖好，仲sit左張紙仔係門隙到，一開門張紙仔就會跌落地，如果佢有鎖匙入過黎，起碼我知道先，呢招我去旅行住民宿時成日用，如果第二朝張紙仔跌左落黎，我會即刻check一次財物，睇下有無唔見野。

因為我係果d一訓就訓死左既人，人地係隔離打麻雀我都可以訓得著。

講番正題，聽把聲，似係王總既喊聲，估唔到佢牛高馬大都會喊，不過人地d家事唔理得咁多啦，兩點鐘左右就訓左喇。

第二朝八點訓醒，即刻去望紙仔，跌左落地，個心涼一涼，睇下有無唔見野先，好彩，所有野都係床頭櫃到，d器官都仲係到。

出到廳，已經見到王總係到睇電視。

我：王總早晨，咁早起身既？

王：慣左喇。

跟住同佢出街食個早餐，就落香港簽約，去到關口時，佢同我講左番說話。

王：唔好意思呃左你，其實我老婆已經死左，但我一直都感覺到我老婆同我住埋一齊，佢仲未走架！自從佢死左，部電視就會無啦啦自己轉台，甚至係開關電視，隔離無住人，唔關遙控事，d燈我就唔知關老婆事定關電力公司事，反正佢成日都會閃閃下，不過都係自從我老婆死左先變成咁，琴晚我驚講出黎會嚇親你，所以先呃你，你問我關於老婆既事，搞到我諗番起佢，琴晚都忍唔住喊左陣，我真係好愛佢。

王：我都有諗過移民，反正大陸得番我一個，老爸老媽都唔係到喇，但我放唔低佢（老婆），我驚佢唔識跟住我走，又驚佢過唔到關，因為呢到皇氣好重，d公安會唔俾佢過架！

講講下，我見到佢眼尾又有d淚光，我拍拍佢膊頭，對住一個用情咁深既男人，我都唔知講咩好，我未拍過拖，唔係好明。

之後落到香港，好順利簽左約，同佢食左餐飯，就送番佢去關口。

到左夜晚，打個電話俾番親戚先，一黎多謝佢啦，二黎話晒個客都係佢介紹，禮貌上都要報告下既。

我：舅父，傾好左喇，多謝你丫，遲下上黎請你食飯。

舅：唔洗啦，我當幫個好朋友。

我：要既要既，係wo，你知唔知王總老婆既事？

舅：咩事丫？

我：佢老婆死左件事

舅：死你個頭！好地地做咩咒人死？王總同佢老婆係我隔離丫，佢請左我去佢屋企食飯多謝我，洗唔洗俾個電話佢地聽？

我：下？！咁唔洗喇，我都食飯先，拜拜。

我收線都收唔切。

到依家我都唔知，係王總純粹講大話嚇下我，定係我舅父時運低，不過由佢啦，下次打死我都唔會再去佢屋企。

## CASE II 冥婚

上年年尾，我有個客人不幸過左身，女仔黎，都幾可愛，廿五歲，佢同佢男朋友係一次交通意外中過身。

我之前每個月都會見佢一次，同佢update番d市場資訊同review番個portfolio，從佢說話中，其實都睇得出佢對未來既婚姻生活好憧憬，佢男朋友都係一個好仔黎。

我最後一次見佢係二千一三年十一月，佢話計劃緊結婚，仲話遲下請我去飲，老實講，聽到朋友既喜訊，當然開心啦。（基本上我當客人都係朋友咁睇。）

但好可惜既係，十二月，一次車禍，兩個人，就唔係呢個世界喇。

收到呢個消息時，遺憾之餘，我第一時間整理番晒d文件時，要將佢放係我到既投資退番俾佢屋企人先。

喪禮大約係一個月後，我八掛問下個朋友，點解咁遲先搞喪禮？佢話，有陣時死者家屬無咁多錢，要去幾間殯儀館格下價，最重要係，喪禮都要揀好日子，有陣時要隔好耐先搵到好日子搞喪禮架。

咁話晒相識一場，於是去左鑽石山間殯儀館，鞠個躬，講聲拜拜。

殯儀館唔係第一次去，但每次去都好壓抑，感覺好唔舒服，見到家屬喊到豬頭咁，個心都戚戚然，拿住拿住，基本上個靈堂得黑白兩色，最colorful就係d鮮花，特別顯眼，望住d花，唔知點知會諗番起個女仔，諗住佢果個好陽光既笑容。

靈堂正中間掛住兩張大相，一張係個女仔，一張係女仔個男朋友（未婚夫），個喪禮應該係兩家人合理一齊搞。

隔左兩個禮拜左右，我再約個女仔既媽媽，做番d文件轉交手續，佢媽媽係一個好傳統既女性，內地落黎，份人都好nice，大約50歲，睇得出今次喪女對媽媽既打擊好大。

我：姨姨，節哀順便呢d係阿佳（女死者）生前放係我到既資產，我依家俾番你啦。

媽：唔該晒你！果日（喪禮）都有見到你，有心。

我：都係相識一場，應該既。

媽：遲d我屋企會辦喜事，希望你都會黎啦。

我：一定一定！

我心諗，岩岩過左白事，辦番場紅事沖喜下都好正常既，於是諗都唔諗就應承左。

點知，呢次真係大開眼界喇！

又隔左一個月，其實我已經無咩印象，你話無我良心又好，記性差又好，生離死別見太多，感覺不大

· 如果唔係發生件特別事，我應該都唔會記得呢個case。

有一日，公司無啦啦收到封信，秘書姐姐拎黎俾我，信封面係寫我個名。

一拆開，吊左聲，又係喜帖，無錢無錢無錢，我呢個初戀都未試過既人，真係唔係好明結婚究竟有幾開心？

不過呢個炸彈唔係紅色，係白色，都幾令幾優雅，耳目一新，邊個fd咁有taste呢？我懷住好奇既心打開左佢。

。 。 。 。 。

SHIT！

做乜9？竟然玩d咁既野？

冥婚！

不過我份人就真係好仆街既，我第一時間諗，點樣鬧洞房丫？我真係第一時間諗埋呢d野，第二件事就係，洗唔洗俾人情？

至於我有無諗過唔去？當然無啦，我份人好奇心都幾重丫，難得有人請我去冥婚，人一世物一世，咩都見識下啦。

講番張貼，都幾特別，用字同正常婚禮既無咩分別，不過無簽名，地點係香港既一間廟，唔開名，時間夜晚九點，係一個星期之後。

老實講，果個禮拜既心情真係既期待又怕受傷害，好似睇鬼片咁，愈驚愈想睇。

事前同朋友講定，如果十二點我都無打電話報平安，記得幫我報警，我就無同屋企人講，廢事佢地擔心啦。

去到間廟，都係鑽石山，就算夜晚幾光猛，無我想像中陰陰沉沉既感覺，可能係市區既關係啦，不過就無咩遊人喇。

地點係其中一個偏廳（唔知係咪咁叫），一入到去，震撼眼球丫！兩大個紙紮公仔，一男一女，比例同真人一比一。

一到去，見唔到熟人，見有人上緊香，我就有樣學樣，上枝香，跟住求奇搵個位坐定定，唔係好敢郁，成日覺得果兩個公仔望緊我。

隔左陣，男方女方家屬一齊由門口並排入黎，手上捧住佢地個神主牌同埋靈相，行到果兩個大公仔，就放低個神主牌係佢地面前，再放相。

跟住有人唔知係邊到拎左一大班紙紮野，有金飾，龍鳳鐲，衣紙，仲有樓，跟住放係側邊個焚化爐入面燒，跟住拎左兩個酒杯，針滿酒，再拎塊紅布蓋住女方個神主牌，全場人起身鞠躬，咁基本上成個儀式就完喇。

( 應該有遺漏，但我實在記唔起喇。 )

成程大約一個鐘左右啦，跟住家屬就多謝同送走d客人，原來冥婚係無飯食架，好肚餓。

總括而言，同想像中，電影中，好大出入，純粹似係一個宗教儀式，都幾感動，生不能同生，死卻能同眠，除左果兩個大既紙紮公仔有d陰森，其他一切都好。

我行去荷里活Food court食個飯，就係鑽石山個地鐵站搭車番屋企。



## CASE III 古董股票

我有個女性朋友，家住屯門圍村，近黃金海岸果邊，好不幸佢爸爸前年過左身，留左一大堆遺產俾佢。

雖然圍村人重男輕女，但成家人得佢一粒女，當佢如珠如寶咁錫，所以佢都有少少港女格。（無意攻擊香港女性，但搵唔到一個更好既term。）

我同佢係中學同學黎，同班左五年，中三至中七，升上大學之後，甚至畢業後都有出黎gathering下，當然只係一大班人果隻，未試過私底下兩個人dating啦，咁大家都應該get到我同佢熟悉既程度。

咁係佢爸爸過身後半年左右，佢整理爸爸既遺物入面，無意係床底下發現左一個鐵箱。

順帶一提，佢爸爸留左兩幢村屋同一塊地皮俾佢，其他資產例如現金果d就真係唔多清楚，我都無問。

講番個箱，都好殘舊下，生晒銹，大約一部家用printer咁大左右啦。

裡面裝左好多古董，或者再講清楚d，入面裝左好多舊股票，係一張張果d股票。

一大疊股票紙（我都唔知點叫呢d野），又黃又舊又殘，擺左起碼幾十年，好驚摸一摸都化灰，但睇下上面寫既野。

嘩！嚇Q死我，每張紙起碼值成百萬，我好驚掂爛左就大檸樂喇！

我個女性朋友，因為都知道我做呢行，所以就叫我幫佢處理左呢d股票佢，但係，大姐丫，你叫我幫你用電腦買賣股票就識姐，我唔係玩開古董架。

但話晒相識一場，我對令女既抵抗力都比較低既，嗲兩嗲，又係咁煩我，唉，我幫你搞掂佢啦。

（當初佢打電話黎係話：我有d股票唔識處理，可唔可以過黎幫我睇睇？）

我太純情，好易俾人呃，算，當做善事。

出門當然靠朋友啦，一有唔識，即刻打俾同事問下先，差唔多半間公司既同事問晒，得一個人講既野係最幫到我：不如你去間公司問下啦。

仲有好多無聊回覆架：

當牆紙貼幾令丫。

去廁所用，去一次用一球，幾過癮。

摺心心送俾條女。

等等啦。。。

咁我就打算幫佢分下類先啦，睇下邊d公司已經執左，邊d公司仲健在，果種標階體真係睇到我眼都殘。

最後大約有八成公司我係聽都未聽過，上網search完，應該都執左。

我：呢八成既應該都淪為廢紙喇，你一係就擺多幾十年，再捐俾香港歷史博物館啦。

女：吊你咩，幾百萬wo。

我：好巴閉咩，我夠捐過幾百億，精啦。

女：喂，幫幫手，搞搞佢丫。

我：得啦，我幫你打電話問下。（心諗：搞搞你就得）

跟住幫佢打左去間銀行問，你依家已經接駁到我地既客戶服務主任，但由於線路繁忙，請稍候x 100次。

等到終於有人聽電話，我將個情況由頭到尾講一次俾佢聽，雖然我見唔到佢個樣，但我諗佢一定係○晒咀，個接線小妹妹聽把聲應該仲好後生，似係岩岩出黎做野無耐，佢話要問下經理先，咁我都無為難佢，留低左電話就收左線。

係等銀行回電話既途中，無所事事，就係佢間舊村屋入面周圍睇下摸下，雖然我唔識玩古董，對古董一竅不通，但有d野feel到既，感覺上間屋入面好多值錢既。

我：你間屋入面既野好似都好耐歷史咁。

女：我唔知丫，我同我老豆呢輩人都係住新起既村屋（佢用手指指住好遠既地方）呢到其實係我阿爺住既，我細細個時都會間唔中黎玩下，大少少已經無印象。

我：咁好地地今日痴邊條線黎呢間屋丫？

女：咁老豆都去左咁耐，新屋果邊d手續丫都搞好晒，見今日放假得閑，咪過黎睇下囉。

呢個時候電話響起，係銀行打番黎，內容大致上都話ok，只要辦番d簡單既手續就可以喇。

呢個時候其實我已經功成身退了，只恨佢唔留我係到食飯，有少少嬲姐，不過總算親眼見過實體股票，都算一場收獲啦。

第二朝早上，個女性朋友打電話俾我。

女：我都係唔賣d股票喇。

我：點解既？

女：廢事麻煩啦，又唔係等錢洗。

根據我對人既觀察，一定有妖孽（古怪），係我好奇心氾濫成災之下，終於俾我chok到個答案。

女：我琴晚夢見阿爺，阿爺同我傾左好耐計，佢話間舊屋既野其實都係留俾我地呢d後輩，可以賣，但唯獨唔可以賣間舊屋，間屋係祖屋黎，建起一塊好好既風水地上面，再三叮囑我千奇唔好賣。

我：咁關d股票咩事丫？

女：諗諗下都係算啦，我突然間好想保留住舊屋個環境，唔想郁到入面任何一件野，我覺得賣左既話，阿爺會唔開心。

我：咁都岩既，你阿爺咁錫你地，得閒多d去拜下佢啦。

跟住我收左線喇。

-----

順提一帶，大家可能會質疑實體股票到依家仲有無用？事實上，股票係你對一間公司既擁有權，有好多公司都有過百年歷史，所以一百年前，你係呢間公司既老板（股東）之一，一百年後都係

實體同電腦只係記錄方式既不同，但係法律上都係有效，分享少少，如果你有呢d實體股票，你去番你間證券行or銀行，存入番張實體股票，跟住間證券行or銀行會pass去中央結算所核實，等幾個工作天，你電腦個股票戶口都會出現番條數

至於張實體股票，佢會唔會俾番你，我就真係唔知喇。。。。

## CASE IV 殯儀入行測試

前文都有講到，其實我有個大學同學係做殯儀生意，佢叫阿國。

話說最近一次既gathering（非殘廁），大家約左出黎，係大排檔隊啤酒，我就同佢講，我最近係discuss寫緊以前既事，其中有一單俾電台抄左黎講，我吊晒鬼。

咁跟住講講下，佢問我，你有無講我以前同你講果單野？

唔係呢一句說話，我都唔記得左以前發生係佢身上既一件事。

咁係幾年前，仲讀緊大學時，佢都有間唔中幫下佢屋企人手，因為殯儀本身係佢家族生意，所以好多野都係佢屋企人教佢，唔洗俾錢上課程。

但呢行唔係個個都做得黎，其中要經過一個測試，有d人天生既八字或者體質未必適合做呢行。

個測試係，將你同條屍放埋一晚，睇下第二朝你有無唔舒服？

撇除鬼怪呢d因素，好多人都會因為係極度恐懼既情況下成晚，導致身體機能失衡，第二朝可能會發燒，又痲又嘔。

好多人講就天下無敵，話乜都唔驚，入到去，好多時一個鐘都頂唔順就出番黎。

咁阿國都係因為呢個原因，於是要入去測試一晚。（就算係家族式生意都要測試架）

講少少阿國既背景先，佢本身係無神論者黎，又細到大都有接觸開，唔驚鬼，但始終人對黑暗係有種恐懼感。佢就話預計自己應該無乜野，第二朝一定可以無穿無爛咁出番黎。

好喇，咁果晚食完晚飯，hea左陣，大約十一點左右就入去喇，阿國帶左張被，iphone同滿晒電既尿袋入去，諗住玩下電話時間就好快過，玩到眼訓咪訓囉。佢老豆會係停屍間出面守成晚，有咩事就大叫佢。

阿國深呼吸一啖，就入左去喇。

停屍間正中間放左一張床，上面已經訓住一條屍，有塊白布蓋係面。聽佢老豆講，個死者同阿國年齡差唔多，係車禍死既，岩岩幫佢化好妝，但仲有d手尾未做好，所以未放得入去住。

呢個時候其實一d都唔驚，因為開晒燈，又知老豆係出面，於是佢就求奇搵張鄧仔坐，係到玩電話。

大約一點左右，開始眼訓，諗住趴係張枱上面訓，但訓左陣都訓唔著，一黎盞燈好殘眼，二黎個氣氛怪怪地，咁大個仔都未試過同條屍一齊訓。

再隔左陣，佢真係忍唔住膽粗粗去左熄燈，因為盞燈阻住佢訓。於是咁一聲熄左盞燈。

訓下訓下，佢覺得愈來愈凍，拎住張被愈來愈實。唔知幾多點，終於佢忍唔住凍醒左，起身去較細d個冷氣。

佢起身走去個冷氣制到，係牆上面，因為好黑，所以開住個電話mon行，都算有少少光，矇矇矇矇突然間見到有個人影閃過，吊，嚇左跳，原來係塊全身鏡黎，岩岩係自己行過既身影。

較細左個冷氣，行番埋位訓，望一望前面塊鏡同鏡入面個黑影，心諗做乜無啦啦多塊鏡係到，可能係老豆係我訓左既時候搬d雜物入黎。算啦，唔深究，繼續訓。

唔知點解，慢慢，又愈來愈凍，又要起身較個冷氣，行到埋去個冷氣制到，又係五度？！明明岩岩較番上廿度架。因為停屍間既特殊需要，d冷氣可以較到好凍。

行番埋位時，又經過塊鏡，都係有個黑影係到，無咩特別。

阿國心諗訓唔著咪起身玩電話囉，玩angry bird，成日形住後面好似有個人望住佢玩咁，但佢另轉頭，當然乜都見唔到啦。

玩玩下，無啦啦聽到嘟嘟嘟嘟聲，係個冷氣制d聲，阿國放低部電話係枱，行埋去睇下，吊，個冷氣又自己去番五度，於是阿國又較番去廿度。

跟住阿國番到埋位，望住個電話，O晒咀，果關卡左佢成半個鐘，無啦啦咁就過左關，仲有三粒星，咩料？

阿國呢個時候，已經知道有鬼，但講真，佢又真係唔驚，又唔係害佢，仲幫佢過關，有咩好驚？做得呢行都預左啦，所以佢都無出去叫佢老豆，因為佢知道，一出去搵佢老豆既話，佢老豆就唔會再俾佢入番呢行做。

唔知隻鬼，繼續打機，上下高登，好快咁，就到左朝早七點。佢老豆開門行左入黎。

老豆：琴晚無咩特別可？

阿國：OK啦，正正常常，不過個冷氣好鬼凍。

老豆：係丫，所以先叫你帶張被入去，個冷氣一到夜晚就較唔到熱架喇。出去食個早餐啦。

阿國同佢老豆出去左隔離間茶記食早餐。食到成咀通粉既阿國，無啦啦問左個問題。

阿國：老豆，做咩琴晚無啦啦搬塊鏡入黎？

老豆：無丫，你入去無耐我就訓左，不嬲停屍間都唔會有鏡架。

阿國突然間，諗番起部冷氣，隻angry bird，同埋個黑影，倒抽一口「梁」氣。